

Međunarodni dan holokausta

27.01.2021 14:19



U povodu Međunarodnog dana holokausta **Radmila Komadina**, glavna savjetnica Grada Mostara, **Amira Trbonja**, načelnica Odjela za privredu, komunalne i inspekcijske poslove i **Božo Ćorić**, načelnik Odjela društvenih djelatnosti, zajedno predstavnicom Židovske zajednice Mostar, položili su danas u ime Grada Mostara vijenac na židovskom groblju «Sutina».

U Bosni i Hercegovini u Drugom svjetskom ratu od 15 hiljada Židova njih 12 hiljada stradalo je u brojnim koncentracionim logorima širom zemalja bivše države. Glavna skupština Ujedinjenih naroda donijela je Odluku da se 27. januara, kada je oslobođen koncentracioni logor "Auschwitz", obilježava kao Dan sjećanja na žrtve holokausta.

Odlukom Vijeća ministara Bosne i Hercegovine od 16. januara 2007. godine, 27. januar se u BiH obilježava kao Međunarodni dan sjećanja na žrtve holokausta.

Vlasti nacističke njemačke otvorile su logor 1940. godine, nekoliko mjeseci nakon invazije na Poljsku. To je mjesto najvećeg židovskog stradanja. Drži se da je u Auschwitzu ubijeno oko milijon Židova, 75.000 Poljaka, 21.000 Roma, 15.000 vojnika Crvene armije. Prema podacima iz različitih izvora, ukupan broj

stradalih Židova u Drugom svjetskom ratu kreće se od 4.194.000 do 5.820.960.

Yad Vashem, izraelski je službeni memorijalni centar posvećen žrtvama Holokausta. Osnovan je 1953. posebnim zakonom (Zakonom Yad Vashem koji je donio Knesset, Izraelski parlament. Tijekom holokausta veliki broj ljudi je pokušao pomoći Židovima i skriti ih od progona i pogroma koji je prijetio.

Time su riskirali svoj život a kako žrtva tih ljudi ne bi bila zaboravljena 1963. godine donesena je odluka o osnivanju spomen mjesta Yad Vashem; spomen područja na stradale Židove i na one pripadnike naroda koji su tokom Holokausta izložili svoje živote spašavajući Židove. Svim Pravednicima ujedno se dodjeljuje i počasno državljanstvo koje ta osoba može i koristiti. Memorijalni centar za židovske žrtve holokausta u Izraelu prepoznao je više od 26.000 osoba kao "Pravednika među narodima".